

29 JUL 2002

LID-Tiba

LAPAN BELAS KETUA NEGARA SAHKAN KEHADIRAN PADA LID 2002

LANGKAWI, 29 Julai (Bernama) -- Lapan belas ketua negara telah mengesahkan kehadiran mereka pada Dialog Antarabangsa Langkawi 2002 (LID 2002) yang akan berlangsung di Pelangi Beach Resort, Pantai Chenang di sini mulai 1 hingga 4 Ogos.

Jurucakap Global 2002-Sekretariat LID hari ini berkata pemimpin negara serta delegasi masing-masing dijadual tiba di Lapangan terbang Antarabangsa Langkawi di Padang Matsirat mulai esok.

Ia menjadikan seramai 380 orang dari 56 buah negara telah mengesahkan kehadiran mereka, katanya.

Setakat ini 10 ketua negara telah menetapkan jadual ketibaan mereka.

Delegasi dari Botswana merupakan yang pertama dijadual tiba di Langkawi esok dengan diketuai Menteri Kewangan dan Pembangunan Perancangan Baledzi Gaolathe, katanya di sini.

Perdana Menteri Lesotho Pakalitha Bethuel Mosisili, Perdana Menteri Mauritius Aneerood Jugnauth, Presiden Namibia Dr Sam Nujoma, Naib Presiden Seychelles James Alix Michel dan Timbalan Presiden Afrika Selatan Jacob Zuma adalah antara ketua kerajaan yang dijadual tiba Rabu ini.

Presiden Rwanda Paul Kagame, Presiden Sudan Omar Hasssan Ahmad Al-Bashir dan Presiden Zimbabwe Robert Mugabe pula dijadual tiba pada Khamis.

Sementara itu, antara ketua negara lain yang telah mengesahkan kehadiran tetapi belum menetapkan jadual ketibaan ialah Presiden Burundi Pierre Buyoya, Presiden Ghana John A.Kufuor dan Ketua Menteri India Sree S.M.Krishna.

Yang lain ialah Presiden Uganda Yoweri Kaguta Museveni, Perdana Menteri St Lucia Dr Kenny D.Anthony, Presiden Nigeria Olusegun Obasanjo, Perdana Menteri Mozambique Pascoal Manuel dan Perdana Menteri Malta Dr Edward Fenech.

Presiden Republik Kyrgyz Askar Akaev dan Raja Swaziland Mswati III juga telah mengesahkan untuk menyertai LID 2002.

LID yang diadakan sejak 1995 seperti juga Dialog Antarabangsa Selatan Afrika Selatan (SAID) dan Dialog Antarabangsa Afrika Timur (EAID), sentiasa mendapat perhatian negara membangun kerana ia mengumpulkan wakil kerajaan serta sektor swasta masing-masing untuk bertukar-tukar pendapat dan idea mencari jalan terbaik memajukan negara masing-masing.

LID 2002 yang akan memberi tumpuan kepada isu keganasan, kegawatan ekonomi dan sosial itu dijadual dirasmikan Perdana Menteri Datuk Seri Dr Mahathir Mohamad yang akan menyampaikan ucapan pada Khamis malam.

Sebelum ini LID beberapa kali diadakan di Berjaya Beach and Spa Resort di Teluk Burau.

-- BERNAMA

NH RON